

REGIONAL NEWS

(MIDDAY)

NATIONAL TRIBAL YOUTH FESTIVAL

Ministry of Tribal Affairs leh Directorate of Social Welfare, Women & Child Development Department hmalakna in National Tribal Youth Festival chu State Tribal Resource Centre, Kelsih-ah vawiin atanga hman tan a ni dawn.

Ni 4 awh Festival hi Chief Secretary Pu Khilli Ram Meena chuan khuallian niin a hmanpui dawn a, vawiina hun hman turah hian Social Welfare, Women & Child Development Department thusawi bakah Ministry of Tribal Affairs palai thusawi ngaihthlak a ni dawn am heng bakah hian zai leh lam hrang hrang a awm dawn a ni.

He festival chhung hianrimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, he hunah hian Nagaland atangin Imnainla Jamir, Manipur atangin Vawnochawi Vaiphei leh zaithiam hrang hrang an inlan dawn a, April ni 11 bik hi Naupang te pual bika hun buatsaih niin Department chuan he hun chhim tur hian mi zawng zawng an sawm a ni.



CM

Chief Minister Pu Lalduhoma chuan vawiin khan a pisa ah mi pawimawh hrang hrang hmu in hmasawnna tura hmalak dan tur an sawiho.

Pu Lalduhoma hian Director General of the Narcotics Control Pu Anurag Garg a kawmna ah Mizoram paltlang ruihhlo tawlhruk hmachhawn dan tur sawipuiin an hmalakna tichak thei tur rawtna an neih hrang hrang te chu ziaka pe turin a hrilh a. Khaw chhak lam atanga ruihhlo lo lut nasa tireh thei turin ramriah venhimna kawnga hmasawnna hnathawh hrang hrang an mamawh a ti a, thawktu indaih zawk an neih a ngai tih sawiin sawrkar laipuiah rawtna an thlen a ti a, Mizo Territorial Army dinsak turin Ministry of Home Affairs ngen an ni tih a sawi bawk.

Pu Anurag Garg hian, Mizoramah Zonal Office puitling awm thei se tha a tih thu a sawi a, thawktu lam neih belh pawh a tul thu sawiin Mizo tawng thiam ngei thawktu an mamawh hle tih Chief Minister hi a hrilh bawk.

Vawiin vek khan Chief Minister chuan a office-ah IFAD Design team te a kawm a. Mizorama FOCUS 2.0 kalpui dan tur an ruahmanna enpuiin Pu Lalduhoma chuan FOCUS 2.0 atana an thil ruahmanah belh deuh hlek tula a ngaih te a hrilh a, scheme dang nena kalkawptir a that a rin thu sawiin hmalakna inbawhthuah a awm loh nana department dangte nena inhre tawna kal a pawimawh thu leh thil thar chin chhuah lama hmalak uar a thaa a hriat thu a sawi bawk.

Pu Piyush Kanal, Country Programme Analyst, IFAD & ICO chuan kum 2019 atanga bul tana, kum 2024 a tawp ta, FOCUS Mizoram district 6 a khaw 272 a cheng chhungkaw 55,000 te tana hma an lak dan tlangpui a tarlang hmasa a. An hmalakna zarah chhungkaw 41,888 te chuan sik leh sa inthlak tuar thei eizawnna an thlang zui ta nia an hriat thu a sawi.

*FOCUS thawh hnihna hi Mizoram district 11 a RD Block 26 huama khaw 700 huapa kalpui tura ruahman a ni a, hmalakna tura hmachhawp zingah tharchhuah tihpun leh khaw awmdan inthlak zel tuar thei chi thlai uar tura ruahman niin Mizoram sawrkarin Zau Policy a kalpui tur nena kal tlang thei tura ngaih a ni a, heng bakah hian Bana Kaih nena inhne rual taka kalpui tura ruahman a ni bawk.*



FCS&CA MINISTER

Supply Minister Pu B.Lalchhanzova’n nimin khan Tripura atanga Gas pipe line hmanga Mizoram gas chawk luhna tura hnathawktu Indradhanush Gas Grid Limited (IGGL) leh Tripura Natural Gas Company Limited (TNGCL) Company-atanga mithiam te kawmin hmachhawp hrang hrang a sawipui.

Pu B. Lalchhanzova chuan Tripura Panisagar atanga leihnuai Gas Pipe line hmanga Mizorama gas lakluhna tura hnathawh mek thlen chin leh hmachhawp awmte a chhawrtu tur mipui an nih angin chak taka hna a kal theihna tura an theihna zawn theuha ngaihtuahna sen a tul thu a sawi a, gas pipe line hmanga gas lakluhna turah Mizoram chu tlangram a nih avangin leimin lakah a him theih nan a thawktu company-te fimkhur tura chahin gas lakluh tur chu In tinah Electric chhit anga lak tur a ni a, tuna gas hman lai aia zang daih a nih dawn avang leh a pipe chu thir tha tak hman tur a nih avangin put theilo tura duan a ni tih sawiin a hlauhawm phah dawnlo a ti a, tuna gas hman lai aia man tlawm zawka an hmang thei tur chu hmasawnna lawmawm tak a nih thu a sawi.

Minister chuan gas pipe line hna chak leh tluang taka thawh a nih theih nan Mamit District Bawrhsap, FCS&CA, Commerce & Industries Department-te bakah Pipe line kalkawnga harsatna awm thei tur kawng lam enkawltu PWD te nen thlatin review meeting neih thin tum a nih thu sawiin he hna kalpuina kawngah hian Sawrkar chuan theihtawp a chhuah dawn a ni a ti.

*Tripura Panisagar atanga Sihmui thleng tur Gas pipe line hi kilometre 104 tur a ni a, kilometre 100 hi Mamit District chhunga kaltlang tur niin Hna zawh hun atan hian kum 2027 March ni 31 ruahman a ni a, tunah hian kilometre 23.148 a thui pipe hi phum tawh a ni. Gas pipe line hi Tripura sawrkar hnuaiah kum 1990 atanga kalpui a lo ni tawh a. Tripura atanga Mizorama lakluhna hna hi Indradhanush Gas Grid Limited te'n an thawk anga, Mizoram chhunga In tina connention pek hna hi Tripura Natural Gas Company Limited te'n an thawk thung dawn a ni.*



CYMA

Central YMA chuan vawiin khan thuchhuah siamin March ni 15-a Mizoram Police in Ruihhlo thahnem tak Hawng 440 lai leh inhnamhnawiha puh Henry Lalbiakzinga Chhundeng, Dinthar, Aizawl ami leh a thurualpuite an man chu lawmawm antih thu an sawi.

Central YMA thuchhuah tarlan danin thalai tam tak ruihhlo bawiha an tan mek laia Ruihhlo hmanga sumdawnna kalpui ani chu an haw takzet an ti a, Henry Lalbiakzinga Chhundeng leh a thurualpuite chu an phu tawk anga dan hmanga hremna an chung a lek ngei anih thueih nan Central YMA chuan a thlir zui reng dawn a ti a, hemi kaihhawiha Kulikawn Branch YMA leh Ramhlun North Branch YMA te hmalakna chu an thlawp tih an sawi bawk.

Central YMA chuan ruihhlo hluar zel tur ven nan theihtawp an chhuah tih sawiin Central Anti Drugs Squad (CADS) an din thar leh an ti a, hmun hrang hranga YMA ten mahni huamchhungah tha thlah lova theihtawp chhuah zel turin an chah tih an sawi bawk.



RD MINISTER

RD Minister Prof Lalnilawma’n nimin khan Serchhip P&E Venga Rural Development Department, Serchhip RD Block Office Building thar a hawng.

Minister chuan hemi puala inkhawma thu a sawina ah office building thara thawktuten Zonun Zemawi-Hawihhawmna nen tha taka hna thawk turin a chah a, Office hna chuan hmasawnna tha leh duhawm, thingtlang lam leh ram mipuite tan thlen ngei se a duh thu sawiin, thawktuten phurna thar nen an phak ang tawk theuhah theitawp chhuah thar theuh turin a sawm a ni.

Prof Lalnilawma chuan tunlaia tuihna tlem zel tih ziaawmna turin Sarovar 2.0 programme hnuaiah chak taka hmalak mek a nih thu sawiin mi rethei in sak tanpuina PMAY scheme kaltlanga hmalak mek a ni tih sawiin Rural E-Library changtlung nei turin hmalak mek a ni a ti bawk.

Serchhip RD Block ah hian PMAY(G) scheme hnuaiah mi rethei in sak tanpuina chhungkaw 525 pek tawh niin, Ni Za inhlawhna – MGNREGA hnuaiah khaw 44 an enkawl a, Job Card Holder 12746 an awm mek a ni.

